



**Les Fleurs Des Vies Des Saints Et Des Festes De Toute
L'Annee, Svivant L'Vsage Dv Calendrier Romain Reforme**

Augmentees des Saints & Bien-heureux Peres Iesuites, de Saint Charles
Borromee, & de Sainte Françoise ; Avec le Martyrologe Romain, pour
tous les iours de l'Annee ...

Ribadeneyra, Pedro de

Paris, 1631

x La vie de sainte Eulalie de Meride, vierge & martyre.

[urn:nbn:de:hbz:466:1-75777](https://nbn-resolving.org/urn:nbn:de:hbz:466:1-75777)

10. DEC. & 7. iours, il mourut tres-content d'aller iouyr de Dieu, & de ce qu'il laissoit l'Eglise libre des persecutions des tyrans, & pacifique sous l'Empire de Constantin. Il deceda le 10. Decembre 313. Le Martyrologe Romain dit, qu'il endura beaucoup en la persecutiō de Maximian, & qu'il mourut lors que l'Eglise iouysoit de la paix: & d'autāt qu'il souffroit de grāds trauaux, les Martyrologes anciens l'appellent saint Melchiades Martyr, & l'Eglise le celebre comme tel.

Son corps fut enterrē dans le cimetiēre de Calixte, en la voye Appienne, & son chef sacrē est à Rome, en l'Eglise de la maison professe de la Compagnie de Iesus. Les Martyrologes font mention de luy, & les Auteurs anciens & modernes qui ont escript les vies des papes.

LA VIE DE SAINTE EULALIE
de Meride, Vierge & Martyre.



L n'est pas hors de propos que nous adioustions à la vie & martyre de sainte Eulalie de Barcelone, que nous auons escripte le 12. iour de feurier, celle d'une autre vierge Eulalie de Meride: aduertissant preallablement le Lecteur, qu'il y a des Auteurs qui n'en ont fait qu'une des deux, & se sont trompez, à cause qu'elles portoiēt vn mesme nom: toutes deux ieunes, qui sans estre apprehēdees s'allerent presenter au Iuge, & s'offrirent au martyre qu'elles endurerent en vne mesme persecution: & sous le mesme President Dacian, & qu'on veid les ames de l'une, & de l'autre monter visiblement au ciel en forme de colombes, & que nostre Seigneur Iesus Christ, couurit leurs corps de neige qui tomba dessus, De maniere qu'il ne se faut pas esmeruiller, si se rencontrant tant de conformitez entre elles deux, quelques-vns ont pensē que les deux ne fussent qu'une mesme: mais l'une naquit à Barcelonne, l'autre à Meride: l'une de 14. ans, l'autre de 12. l'une martyrisee en Barcelonne par le President Dacian, & l'autre par vn Iuge subleguē nommé Calpurnien. Celle de Barcelonne eut la teste tranchee, ou mourut en Croix, celle de Meride fut bruslee. La vie & le martyre de laquelle fut descrit par le Poete Prudence, qui viuoit il y a plus de douze cens ans en vn Hymne fort elegāt duquel & des Breuiāres & Sanctoraux anciens, nous en auons tirē tout ce que nous en dirons icy.

Sainte Eulalie estoit natifue de Meride, issue de noble lignee: son pere s'appelloit Libere, homme Chrestien, & craignant Dieu, lequel auoit nourry sa fille des son enfance en toute vertu, & luy auoit baillē à elle & à vne autre fille nommee Iulie, vn prestre appellē Donat pour les instruire: elle affectionna tellement la virginitē & les choses de la Religion, qu'elle ne soucioit pas des lors des braueries ny parures, & ne uouloit ouyr parler de discours de mariage, se monstrāt fort posee & retenuē en sa face, en ses paroles,

& en son maintien. Elle auoit atteint l'age de douze ans lors que Calpurnien, Iuge commis & deputē par Dacian arriua à Meride (qui estoit lors vne grande ville riche, & peuplee) pour persecuter les Chrestiens, & y executer ce que Dacian faisoit par tout où il passoit. De peur d'y faillir, & afin d'auoir cognoissance de ceux qui estoient Chrestiens, il fit publier vn sacrifice solennel à ses Dieux: Les parens de la Vierge la voyans esprise de l'amour de Iesus-Christ, & desiruse du martyre, craignans de la perdre, & que ce tourbillon ne la leur rauist, ils la tenoient cachee à dix lieues de la ville, en vne de leurs terres nommee Poncien, du costē de l'Andalusie: Mais quand la sainte fille ouyt parler de l'Edit que le Iuge auoit fait publier, le poete Prudence dit, qu'elle vint dans la ville secrettement de sa propre volonte pour s'offrir au martyre, tant elle brusloit d'enuie de mourir pour I.C. qu'elle auoit choisi pour son Espoux. Aucuns disent, que la sainte vierge Iurie venoit avec elle, & que l'autre s'estant vn peu aduancee sur le chemin, elle luy dit, Eulalie (comme en esprit prophetique) vous auez beau vous haister deuant, ie mourray la premiere: La ieune fille estant arriuee, s'adressant à Calpurnien, avec vne grande liberte, luy reprocha la cruauté dont il vsoit enuers les Chrestiens, l'auarite de ses dieux, & la tyrannie des Emperours. Le Iuge essaya de la tromper par ses discours, luy remettant deuant les yeux sa noblesse, sa delicatesse & bas aage, taschant par flatteries & promesses, comme à vn enfant, de la diuertir de l'amour de Iesus-Christ. Voyant qu'il perdoit temps, il chargea la douceur en rigueur, les flatteries en terreurs & tourmens, qu'il fit executer sur cet agneau, avec tant de furie, qu'il n'en vsoit pas de plus cruels contre les saints Martyrs de ce temps-là. Elle fut rudement fouettee & on luy brisa tous les os avec des cordes plombees: puis on luy versa de l'huile bouillante sur la peau escorchee de coups, on l'esgratigna avec des harpons de fer, puis on la leua & destira à la torture, & pendant elle qui auoit Dieu en son ame, monstrant en son visage la ioye de son cœur, & leuant les yeux au Ciel, se recommandoit à son cher Espoux, implorant sa faueur, & regardant ses playes (comme escript Prudence) luy disoit: *Maintenant, ô mon Redempteur Iesus-Christ, vous estes bien plus remarquable en moy: & ces lettres qui sont escriptes sur mon corps avec mon sang merepresentent beaucoup mieux vostre Passion.* En fin ils la firent mourir dans le feu, & elle receut la couronne du glorieux martyre, comme dit saint Isidore: Prudence adiouste: que ceste sainte Vierge auoit vn tel desir de mourir pour Iesus-Christ: qu'elle ouurit la bouche pour aualler des flammes, & estre plustost consommee: ce qui est conforme à ce qu'en rapporte le Martyrologe Romain, qu'elle rendit l'esprit apres auoir beu le feu & la fumee; Ainsi finit la sainte vierge, comme vne Colombe blanche sans fiel: & son ame fut apperceue s'enuolant au Ciel en figure d'un pigeon blanc, entr'autres par le bourreau mes-

me qui l'auoit tourmentee, dont il fut tellement esmeu & espouuanté, qu'il fit penitence.

Et d'autant que le corps saint demouroit tout nud & descouuert, il tomba soudain vne grande quantité de neige pour le couvrir, & depuis les Chrestiens l'inhumèrent le mieux qu'ils peurent: Du temps du poëte Prudence il y auoit desia en meride vne belle Eglise dediee en son nom, où elle estoit reuerce, ainsi qu'il dit luy mesme: ses saintes reliques ont tousiours esté teneues en grand honneur, & nostre Seigneur y fait plusieurs miracles par son intercession, & conferue sa patrie. Les Gots respectèrent l'Eglise, & la chemise de sainte Eulalie. Le Roy Dom Pelage restaurateur d'Espagne, & le fleau des mores, voulut estre enterré en vne Eglise du nom de ceste Saincte, autrement sainte Olalale de Velanie, à cause qu'il l'inoqua à son ayde, quand il vainquit les Mores. Theodorice Roy des Gots ayant assiegé Meride, sainte Eulalie la secourut, & empescha qu'elle ne fut ruynee, commandant la nuit en songe au roy, qu'il eust à leuer le siege: ce qu'il fit.

On raconte plusieurs autres victoires & heureux succez qu'ont eu les Chrestiens par l'entremise de ceste glorieuse vierge, à laquelle les Espagnols ont vne grande deuotion: plusieurs femmes portent son nom, mesme des bourgs & villages dans le royaume de toledo & d'Andalousie, qui est vne marque des grands merites de ceste vierge, & du respect qu'on luy porte. Gregoire de tours escrit vn miracle qui auoit accoustumé de se faire tous les ans le iour de son martyre, de quelques branches d'arbres dont on couuroit son tombeau, & quoy qu'ils n'eussent point de feuilles (à cause que la feste est au mois de Decembre) ils florissoient ce iour-là, & produisoient des fleurs saintes comme de petits pigeons, qui sentoient fort bon, par le moyen desquelles, selon le temps qu'elles seroient, le peuple faisoit coniecture si l'annee suivante leur seroit propice ou defauorable, remerciant nostre Seigneur de l'vn & suppliant de l'autre, qu'elle garantist leur ville de toute calamité. Ce mesme iour du martyre de sainte Eulalie, sa compagne Iulie eust aussi la teste tranchee, suivant ce qu'elle auoit predict. Le corps de sainte Eulalie fut transporté de Meride à Ouide, où il est à present en vneriche chaste d'argent faite en forme de cercueil, qui monstre bien son antiquité. Il est en l'Eglise Cathedrale sur vn Autel dedie sous son nom. On a coustume de le porter en procession lors de quelque necessité extrême, & se trouue par experience que nostre Seigneur exauce les prieres de son peuple, & enterine leurs requestes par l'intercession de ceste glorieuse Vierge, le martyre de laquelle aduint le 10. de Decembre, l'an 304. sous l'Empire de Diocletian & Maximian. Les Martyrologes font mention d'elle, & les Auteurs qui escriuent les Vies des Saincts, outre ceux dont nous auons parlé en ceste vie.

A Rome deceda S. Melchades, ou Melchades Pape, lequel eut beaucoup enduré durant la persecution de Maximian,

mourut apres que l'Eglise fut remise en paix. A Spolite saint Carppore Prestre & Abundie Diacre, lesquels durant la persecution de Diocletian furent cruellement meurtis à coups de bastons, puis mis en prison, où personne ne leur donnoit à boire ny à manger, tourmentez sur le cheualet, detenus en prison, & finalement decapitez, A Meride en Espagne sainte Eulalie vierge durant la dite persecution; estant aagée seulement de douze ans endura plusieurs tourmens par le commandement du President Dacian, fut mise sur le cheualet, perdit les ongles, endura les flambeaux ardants qu'on luy appliqua des deux costez, & ayant humé du feu, rendit son ame à Dieu. Au mesme lieu sainte Iulie vierge & martyre, laquelle fut compagne de sainte Eulalie, & comme on la menoit au supplice, la suivit tousiours, sans se partir i amais d'elle. En Alexandrie les saints martyrs Menas, Hermogenes, & Euegraphe endurerent la mort du temps de Maximian. A Angori ville de Galatie, qu'on appelle auourd'hy Amasia, S. Gemelle martyr, apres auoir enduré diuers tourmens du temps de Iulien l'Apostat, fut en fin crucifié. A Lentili ville de Sicile, S. Mercuré & ses compagnons soldats & martyrs lesquels du temps de l'Empereur Licene, sous le President Tertulle, passerent par le fil de l'estree. A Vienne en Dauphiné S. Sindulphe Euesque & Confesseur.

LA VIE DE SAINT DAMASE
Pape.

Les tres-sainct & tres-docte pape Damase, estoit Espagnol de nation: son pere s'appelloit Anthoine. aucuns disent qu'il estoit natif de Tarragone, d'autres de Madrid, & en l'Eglise de saint Sauueur de ladite ville il y a vne lettre qui le porte: d'autres le font portugais natif de Guimarans, qui est entre la ouere & Migno. Saint Damase fut vn braue Pape, & fort loüé des escriuains de son temps. Theodoret dit, qu'on l'appelloit homme admirable & digne de louange, qui reluisoit en toute vertu. Saint Hierosme son secretaire & grand amy, entr'autres loüanges, dit de luy, qu'il estoit vierge sans tache ny souilleure, comme vn vray Pape de l'Eglise. Saint Ambroise dit, qu'il fut esleu par iugement diuin: & au sixiesme Concile de Constantinople, ils l'appellerent Damian de la Foy, à cause de sa grande fermeté & constance contre les heretiques qui troublèrent l'Eglise de Dieu de son temps. Les autres Auteurs ne peuuent assez extoller ses grandeurs & excellences. Il succeda au pontificat du Pape Libere, duquel il auoit esté prestre & Vicair. Apres son eslection, vn Diacre nomme Ursin, ou Ursin, homme inquiet & ambitieux, brigua pour se faire eslire, & fut assisté de plusieurs suffrages, qui furent cause d'vne grande altercation en la ville de Rome, en forte que ceux d'vn party & d'autre vindrent aux mains & y en eut plusieurs blesez & tuez, tant d'vn costé que d'autre: ce qui fut occasion d'vn schisme en l'Eglise de Dieu (neantmoins contre la volonté du saint Pape Damase) duquel S. Hierosme escrit, qu'il estoit benin, & qu'apres auoir surmonté ses aduersaires, il ne les maltraita aucunement. Ce schisme fut inconcintement appaisé, & supplanté par la verité, & par l'autorité de Valentinian l'aîné, on trancha les maux qui pouoient surceonner d'vne mauuaise racine, & saint Damase demoura

10.
DEC.

11.
DEC.